

甘泉鄉人稿

甘泉鄉人稿卷十八

嘉興錢泰吉輔宜

先祖考妣行述

嗚呼泰吉安能狀我祖考妣行事耶先大夫嘗欲纂輯事實以乞墓上之文吏事常鮮暇閒握管哀至輒哭或以他事止卒不能成及病甚因以命泰吉曰府君生四歲所生母沈太恭人卒妣俞太夫人絕愛憐焉年十八而以喀血卒後八年我始生府君之行我不能詳也而文端公太夫人爲我道府君未嘗不歔歔太息我本生考安慶府君及我諸父諸姑相與語及府君亦未嘗不

歔歔太息也然則府君之於父子兄弟閒蓋可想矣先  
太宜人嘗出府君所書王右丞七言律詩以畀我上有  
乾隆二十年文端公題字曰此三兒某十三歲所錄者  
今已十年每檢其所遺皆有成人之度付裝潢存之  
令其婦貞女馮氏什襲嗚呼讀文端公之題識而府君  
之行益可想見我既不逮事府君而太宜人之育我也  
恩勤備至天胡不佑十齡而奪我恃文端公太夫人嘗  
訓我曰爾母之守貞也十有七年柏舟之義戚族既聞  
爾矣其孝行或未之能詳也少時侍母扶父櫬還自蜀  
跋涉數千里能使母忘其勞與哀爾伯叔母從宦於外

爾母常侍我兩人側能使老人忘諸婦之遠離也爾外  
大母困牀第者六七年時往當湖調藥洗臉能使母疾  
有瘳而我得紓手足之憂也蓋爾母於此亦甚瘁矣文  
端公旣以詔我因製輓聯云堅貞永矢青松操純孝常  
留愛日心及公寢疾曰貞孝之行不可湮也手草事略  
以達於有司及旌旨下公已疾革猶歔歔久之嗚呼  
此我府君及太宜人之行也小子其志之嗚呼先大夫  
所以詔泰吉者蓋如此泰吉何能狀我祖考妣耶府君  
諱汝懋字安叔與安慶府君同爲沈太恭人出生於雍  
正七年己酉二月二十一日卒於乾隆十一年丙寅六

月二十日先祖妣爲康熙癸酉舉人丁丑進士廣西荔  
浦縣河南太康縣知縣平湖馮序皇公諱千英孫女雍  
正甲辰順天鄉試第二名舉人四川南部縣知縣愚堂  
公諱巨欽女兩世皆有惠政詳府志母爲文端公妹與  
府君同歲六月二十二日生乾隆二十八年癸未十一  
月二十日卒三十八年旌三十九年十一月十一日未  
時合葬海鹽縣冬坊南石木之原五十六年建貞孝坊  
於墓次嘉慶元年恭遇 覃恩先大夫未補官例不得  
封季父學士公請貤贈府君儒林郎翰林院編修加一  
級妣贈安人四年 覃恩以先大夫官府君 誥贈奉

政大夫大興縣知縣加二級妣贈宜人道光元年從兄  
儀吉請貤贈府君中憲大夫戶部雲南司主事加六級  
妣贈恭人嗚呼 褒榮之典疊膺於 朝蓋府君及太  
恭人之隱德有以致之也泰吉用敢述先大夫之命以  
乞當世立言君子表墓之文以闡幽潛之光而慰先大  
夫之志世世子孫感且不朽道光四年夏六月孫男泰  
吉謹述 錢塘吳載和填諱

先考蓉裳府君行述

嗚呼痛哉不孝之喪父也十年矣終天之恨何日能忘  
每念府君服官行政垂三十年思欲纂述以備志乘之

采而不孝之生在府君宦閩後惟臨園審結諸案府君  
閒手錄副牘事稍詳他若閩清建安羅源諸邑事十不  
得一二迨六七歲後隨府君宰吳橋及大興雖涉於聞  
見而童騃未能默識或一事而首尾不具或失其人姓  
名嗚呼我府君三十年之政蹟留於民心者無窮而不  
孝反末由稱道其詳也罪安能擢髮數哉今者天降殛  
罰又奪我母痛哉不孝長爲哀哀無告之民矣更不及  
時詮次一旦形神不屬永失記載則罪戾滋大用敢和  
淚濡墨謹述崖略以俟當代大人先生立言君子采擇  
焉府君姓錢氏諱復字景顏一字象緣又自號蓉裳浙

江嘉興縣人先世本海鹽何姓明初貴四公成黔以次子裕寄育於同里錢富一翁遂易錢姓四傳至海石公諱薇是爲府君七世祖嘉靖壬辰進士官禮科給事中以論宮寮削職隆慶初贈太常卿事具明史列傳六世祖魯南公諱與映嘉靖甲子順天舉人五世祖紫芝公諱陞萬曆戊午舉人高祖鶴庵公諱瑞徵康熙癸卯舉人西安縣學教諭曾祖廉江公諱綸光太學生自紫芝公以下皆以文端公貴 誥贈光祿大夫六世祖妣鄭吳高祖妣曹曾祖妣蔡陳皆 誥贈一品夫人祖文端公諱陳羣康熙辛丑進士以刑部侍郎 予告歸 誥



授光祿大夫 特加太子太傅刑部尚書 晉贈太傅  
入祀賢良祠祖妣俞 誥贈一品夫人繼祖妣俞 誥  
贈一品夫人生祖母沈 誥贈恭人考安叔公諱汝慤  
爲文端公第三子少穎悟十三歲工擘窠書十八歲卽  
世以府君恭遇 覃恩 誥贈奉政大夫順天大興縣  
知縣加二級妣貞孝馮太宜人於乾隆三十八年題  
旌 誥贈宜人本生考毓齋公諱汝恭乾隆丁卯舉人  
歷官河南新鄉縣知縣江南丹徒沐陽等縣知縣安徽  
安慶府同知爲文端公仲子本生妣沈太恭人有子四  
人長爲伯父漁莊公諱豫章次卽府君次爲叔父漆林

公諱開仕次爲叔父雲巖公諱福胙旣齋公與安叔公俱爲生祖母沈太恭人出安叔公蚤世馮太宜人守貞來歸文端公盡焉傷之旣齋公念所以慰老人意者府君生彌月請於文端公卽育於馮太宜人所命爲叔父後十歲太宜人卽世府君居喪中禮迨長追思不置寫太宜人遺像而立已於旁時出以示不孝輩爲道太宜人所以鞠養府君者靡不至輒淚潸然下自太宜人卽世後府君始隨侍旣齋公任與伯叔父同讀書相切磋學有進取旣齋公日判案牘閱之能通律意嘗謂不孝曰吾爲民社官幸不隕越者奉本生考之教也又曰清

貧二字吾所受於先人累世之傳者今還以貽爾幸有此耳  
旣齋公閒以政暇攜府君兄弟出郭遊覽或賦詩以紀其事  
若新鄉駱駝灣普濟寺嘗存旣齋公詩卷府君與伯叔父從游之作皆在焉  
乾隆庚寅以國子生試秋闈辛卯病不赴試甲午正月侍旣齋公奉文端公諱  
歸里七月又連遭旣齋公暨沈太恭人之喪襄伯叔父營喪葬盡哀禮丙申援川運例得府經歷分發福建借補侯官縣大湖丞署建安羅源閩清甌園等縣知縣戊申以甌園獄囚病斃去官自占得井曰改邑不改井吾其得原官乎及己酉歲果驗壬子改官直隸補雄縣丞

制府梁公肯堂器府君留省城辦事嘉慶元年丙辰擢  
吳橋縣知縣乃之官己未擢大興縣知縣甲子秋得偏  
枯疾乞休以留交代不能歸明年十二月遽罹大故嗚  
呼痛哉府君嘗曰人謂我作官三十年使稍屈阿當不  
止此然命也人何能爲所可自慰者未得罪於百姓耳  
官閩時適林爽文跳梁福郡王統大兵往勦過甌閩或  
自稱廉從叫於驛庭府君械以徇而其後郡王乃奏還  
府君官府君每舉蘇文忠公遇民如兒吏如奴語而申  
之曰民果不良亦奴也吏果良亦兒也然大勢吏強而  
民弱吏黠而民愚故每事必持以平胥役相與語曰曩

者百姓畏吾儕今吾儕反畏百姓矣府君問之曰吾非必左袒求不擾吾民也聽訟必令兩造各言是非於憤爭時伺其隙徐出一言而決嘗曰家人詬誶不悉其顛末尙難定曲直況小民見官長多畏憚更加以聲勢使不能言何以聽焉兩造具服卽判牘尾俾堂上審視其不識字者吏朗誦使聞曰稍緩則弊生矣以是府君所至無留獄浦城牛欄火延燒數家縣人甘喜里者嘗以他讐詬人曰吾焚若矣隣人據以報竟論斬臬司委府君覆審則實爲失火喜里得免死建安有竊匪福州黃江西黃者匿於魏鳳陽所居後江士壘知之以告其族

人魏許勝逐之去眾匪銜士龔則糾其黨毆之死士龔嘗傭工羅五家羅五遂控鳳陽窩匪且誣其子同毆士龔獄垂成府君至冤始白黃廷祝誣過客黃能實以竊爲營兵丁連貴私拷死瀕死令寫供狀畫押於瓢上以爲信府君曰是誣也至廷祝家驗之竈觚缺瓢一合所畫瓢良是詢之曰爾家竈上瓢安得在營兵所乃吐實蓋竊能實行李中銀易以瓢而反誣之者黃華鳳家爲流丐所苦赴縣控丐更辱其幼子暴呼警隣人張錦超赴救毆丐死府君檢故牘有乾隆二十七年襄陽人陳金遂以孫應祚乞遷祖墳偕其族陳維章阻之互毆致

斃照常人例問擬而部駁照罪人持械拒捕格殺弗論以隣例族錦超不當死臬司屢駁卒如府君議有謝姓者甲居橋東丙居橋西不相能甲之黨從與甲以擅立一心堂聚眾結盟誣控丙府君謂甲曰若與丙同姓乎曰然同祖乎曰然然則何忍而出此睚眦小怨遽興大獄禍且及若矣乃泣悟謝罪去吳橋縣學圯甫蒞任卽捐錢修葺屬教諭劉君振紀王君枋理其事有范姓逋賦者拘之至則明大學士文忠公裔也曰公以身殉國我朝褒忠之典首及焉爲縣令者忍視其子孫以逋賦拘乎乃代納厯年賦有役訴徵糧爲糧戶毆者責之

曰若持官符徵國課民且畏若必無狀乃致毆也糧  
戶至果訴役需索慰之曰後有如此役者當來告我爲  
爾重責毋自毆也乃更笞役大興爲畿輔首邑逢國  
大典皆得執事未嘗有愆儀府尹若戴文端公汪公承  
霈聞公泰和章公煦皆器重府君一時章奏每屬裁稿  
遇疑獄必詢有負責人錢者數人繫獄有年矣府君至  
曰獄所以繫重囚非爲貴人索逋地且若所負者錢繫  
之則錢將安出俱釋之皆如期歸貴人錢曰不敢負錢  
公黃邨營弁與民爭一驢則曰吾使驢自擇其主縱驢  
於通衢竟奔民家營弁乃服貴人姬毒婢死以病死報



兵馬司驗無異詞婢父不服赴部控府君奉

旨再驗事乃白古北口守備倭什額與鎮守官相角而  
自到事聞

詔揀員往鞫府尹以府君名上得

旨往鎮守官郊迎府君曰某小官固奉

命鞫獄者也敢有所徇卒審訊得實辛酉大水通衢沒  
馬背村野不見廛舍民皆升高阜逃死府君亟束木筏  
載餼糧出永安門至孫河黃村禮賢采育諸處給飢民  
全活無算旋奉

旨發帑賑濟於是宣

上恩德按戶給發吏胥無侵漁自六月至明年春居鄉村者六閱月民困乃蘇水初發時在孫河水暴至跪水次願與民俱死頃刻退數尺民咸歡呼以爲神而府君精力亦自此衰矣府君爲政務平易求民之隱官直隸時不孝數見府君控驪馬從二人出署去行視桑麻與田夫野老相爾汝越陌度阡或竟日乃反部民習爲常勿怪也顧事上官強項甚而小民益親以不孝所見去吳橋時民皆遮道畱設酒茗者相望乙丑府君已乞休居京師會生朝鄉民猶聯袂走百餘里攜蔬果爲賀及喪來哭皆失聲蓋子愛之感民者如此府君體素豐

爲雄縣丞時背生疽時諸伯叔父俱官京師伯兄友泗在伯父寓舍讀書及府君以吳橋令引見至夜飲偶袒衣伯兄見背痂以十數卻立泣下然府君不自以介意治事益精勤吏胥備數無所事辛酉勘水災且賑旣積勞矣甲子夏大旱蝗戢戢徧田野府君冒暑忘飢渴以赴焚撲驅逐不舍晝夜厯月餘乃止歸而得疾遂丐去移寓於內城之分司廳衒衒居平不屑屑生產及是時貧甚薪水常不給乃日與東堂族父及不孝塾師沈溯濂表兄聯咏以自遣顧病日甚手不任箸將行則强扶立久之乃起不孝皆懵無知不克侍醫藥侵尋二年

竟以不諱椎心泣血蓋終身之憾弗能釋矣猶幸姑夫  
菘圃吳公璫從兄裴山楷經紀喪事且賴親戚故人之  
賻先妣乃得率不孝扶櫬歸長途無恙則沈味蔗母舅  
應彤扶持之力也嗚呼痛哉府君孝友肫篤旣蚤失怙  
恃歲時祭祀輒悲不自己及病足不良猶強拜跪必如  
禮初我本生祖考妣之沒也第五姑許施氏而未嫁府  
君挈之閩招姑夫就婚官舍歲丙午南中旱荒迎伯父  
母至閩奉事惟謹後以事至京師畱伯叔父寓每夜必  
同寢怡怡然笑語或達旦不倦也府君事至立剖所遇  
無盤錯承累世仕宦後思有所濟於世屢任劇縣政澤

既及民矣而意常歆然不自足好施與急人之急凡所賑恤未嘗爲不孝道姓名學趙文敏書好東坡七言古今體詩京寓臥病時課不孝日讀數首謂不孝曰東坡詩云因病得閒殊不惡安心是藥更無方似爲我今日言之也服官以後不多作詩唯甌甌罷官時有建郡八景唱和詩一卷已刊行嗚呼不孝所能道我府君者止此至家庭雜事則見於先妣行述不復敘嗚呼痛哉府君生於乾隆十九年三月二十四日辰時卒於嘉慶十年十二月初三日寅時享年五十有二 誥授奉政大夫順天府大興縣知縣加二級前直隸吳橋縣知縣雄

縣縣丞分發福建候補府經歷借補侯官縣大湖丞歷  
署建安羅源閩清甌甯等縣知縣配先妣陳太君 誥  
贈宜人廣西柳州府知府省齋公諱景圖孫女方略館  
議敘通判南臺公諱廷桂女逮事我本生祖考妣族黨  
稱孝歸府君一載卒存有手錄樊南文小楷一卷繼配  
先妣沈太君 誥封宜人子四長友泗次震行沈太君  
出蚤卒次在策庶母林出蚤卒次不孝泰吉嘉興縣學  
廩膳生沈太君出娶胡氏同邑太學生曉林公諱斌女  
女八人長適乾隆庚子進士山東道監察御史嘉善程  
愛廬公諱維岳子縣丞借補直隸文安縣主簿若容沈

太君出次行四適歲貢生歸安嚴釐村公諱肇圻子南  
河候補從九品士鈞庶母方出次行八幼未許字庶母  
林出餘五人沈太君出者二庶母方出者二庶母林出  
者一皆未字蚤卒孫男一銘恕幼未聘孫女一幼未計  
字不孝苦次昏迷語無倫次今卜於嘉慶二十一年十  
二月十六日附葬先考妣於海鹽縣冬坊南石木先祖  
考安叔公墓側謹述梗概伏冀當代大人先生立言君  
子賜以銘誄昭垂不朽則不孝世世子孫戴德無旣不  
孝孤哀子錢泰吉泣血稽顙謹述

錢塘吳璠填諱

先妣沈宜人行述

嗚呼痛哉不孝年十五先府君見背熒熒孤苦飲食教誨惟先妣是賴嗚呼痛哉不孝曾不得盡一日之歡而飢寒衣食貽先妣憂且望其成立家之有無不使知恐不孝有所縈心而不克專壹於所業也十年以來心力交瘁疾病時作起居服食力自節省支持門戶不少息肩不孝頑鈍無知視息偷存乃至今日尙忍言哉尙忍言哉獨念先妣爲先府君襄內政者三十年教育不孝以慈母爲嚴父者又十年不及今詮次行略罪戾滋大用敢和淚濡墨謹述梗概伏冀當代大人先生立言君子采擇焉先妣姓沈氏諱德儀爲我考 誥授奉政大



夫順天大興縣知縣蓉裳府君之繼配六世祖竹隱公  
始自吳興竹墩村遷嘉興曾祖諱文彬太學生鄉飲介  
賓祖諱尙傑貢生父諱大業字建偉自號半村貢生行  
事具先曾祖文端公所撰傳略母褚太孺人生子三女  
八人長舅氏諱葵卽不孝長姑夫也兩家親串數往還  
文端公時之沈氏與半村公劇談歡甚半村公命子女  
出見文端公尤許先妣不去口歲甲午先妣陳宜人謝  
世府君夙聞文端公語遂求而締姻丙申先妣年十七  
來歸時府君已援例得府經歷分發福建先妣出匳中  
物佐行跋涉二千餘里抵閩方需次饔飧每不給晏如

也後大吏稍稍聞府君能試以繁劇值林逆作亂大兵  
征勦及凱旋絡繹過境無虛日大吏又以軍需諸事委  
府君籌辦府君一意在公始終無內顧憂人咸重府君  
才而益以知先妣之善操內政也府君遇事可否侃侃  
不少屈不諧上官意戊申以事劾罷己酉得原官又以  
交代留辛亥歸乃於先祖考妣墓旁構丙舍三楹時我  
本生祖考妣墓道亦未築伯父漁莊公叔父漆林雲巖  
兩公方先後通籍官京師會雲巖公以庶常暫假歸伯  
父書來屬府君暨雲巖公爲之兩閱月而成又將營建  
先祖妣貞孝坊已擇期矣府君當赴京掣籤不可緩先

妣乃促府君北上曰建坊之事吾力任之無憂也乃鳩工庀材屬族父毅齋先生壻經紀其事資不足則典質以成之府君籤掣直隸遂赴省供職而先妣留南中者三年甲寅北上舟次諸兄姊妹暨不孝接踵發豆症親爲調藥憂勞倍至至保定府君補雄縣丞留省城辦事以勞致疾背生癰幾殆先妣時寒煖視湯藥目不交睫者數十晝夜乙卯遣長兄友泗就學京師臨行時府君暨先妣慰諭之曰我豈忍令爾離膝下哉京師不遠數百里伯叔父皆在焉我期汝學有成爾行矣事伯叔父母無異我兩人也時不孝甫五齡與仲兄震行雁行立

先妣又指示長兄曰我與爾父有兩弟侍膝下爾毋憂  
能得諸長者歡卽朝夕在側也蓋府君素友愛先妣與  
伯叔母亦雍睦無閒故縷縷命長兄若此丙辰府君擢  
吳橋縣知縣丁巳程寬夫姊壻來贅秋爲大姊營嫁事  
時伯父將告歸先遣長兄來七月長兄及仲兄三姊患  
喉風爲醫所誤相繼逝長兄年十九字學源自號四水  
子謂將津逮濂洛探源洙泗也出都時手書格言二十  
四則授衍石從兄儀吉今年春不孝屬陳新筵丈志甯  
楷書一通先妣閱之猶淚泫泫欲下也自壬子以來叔  
兄在策暨諸姊妹多夭折至是又死喪相連先妣慟甚

遂患喀血症時作時止八月伯父母自京歸過吳橋留十五日戊午叔父漆林公歿於雲南學政任所三月叔母王宜人自京南還時雲巖公視學閩中先遣眷屬南下叔母戚恭人遂與王宜人偕過吳橋留數日大姊亦附舟南歸先妣送至故城而還謂不孝曰吾自爲新婦時與爾伯叔母於秋涇橋老屋聚首數月歲丙午迎伯父母至閩居年餘忽忽十餘年始得先後相見數日卽別爾父常歎宦遊而後與諸兄弟無曩時之樂我與爾伯叔母尤相見時稀也每一會晤不覺感慨係之是夏府君擢大興縣知縣辛酉六月大雨數日水暴發夜臥

牀忽浮乃累食案高丈餘坐臥其上頽垣聲與水聲相  
雜府君急巡行鄉邑卹災民署中水數尺家人處敗垣  
破屋中不及顧雨稍止先妣乃率眷屬遷寓外城壬戌  
夏叔父雲巖公訃至冬又聞施氏姑之訃府君感手足  
之凋謝居恆時鬱鬱歎曰吾同產十餘人今惟長兄及  
適吳氏姊蒯氏妹耳長兄林居六七年矣我安得相從  
上先人邛隴乎先妣亦黯然神傷癸亥嚴仲和姊壻來  
贅十二月爲四姊營嫁事甲子八月府君陡患偏枯之  
疾以病告貧不能歸乃僦居分司廳衙先妣脫簪珥  
延名醫買藥裹勞苦益甚乙丑冬遽罹府君大故先妣

倉卒中料理附身之事盡禮盡哀明年四月扶柩南下  
七月抵家觸熱行盛暑中三閱月江河險阻屢瀕於危  
煢煢母子相依爲命興言及此肝腸寸斷矣嗚呼痛哉  
初文端公擇海鹽縣冬坊之南石木地以葬先曾祖妣  
俞太夫人先生曾祖母沈太恭人且自定生塋故合南  
石木字自號栢南居士後改卜於韋陀蕩俞太夫人沈  
太夫人俱遷祔府君遂乞地以葬先祖考妣地師言穴  
新啟不可用定穴於舊穴之東前數尺至是爲府君卜  
葬地無如先曾祖妣所葬舊穴吉力不能卽窆窆遂謀  
厝焉卽今年卜葬之趾也戊辰不孝補博士弟子員諭

不孝曰爾父病危急時時曰吾安得見履道做秀才爲讀書種子乎我常悲此言嗚呼爾父所望於爾者詎止做秀才爲弋獲科第計哉宜若何自力以無負先人履道者不孝小名也後不孝三黜於有司則勉慰之曰爾學未至也毋躁使從老蒼宿儒知名之士遊嘗曰讀書以古人爲師友交遊亦當在師友之間友朋過從必詢其行事本末曰吾於爾交遊驗學問之進退也先妣體素豐以心力之瘁也疾病之日強半年來喀血稍止而肝疾時作夜不能寐飯不過一甌雖甚委頓而家事井井悉有條理婦女鍼黹侍婢紡紉必督責之不使怠曰



今日之貧正以見先府君三十年清德也爾曹能勤婦  
事弗以累吾兒使無玷先人清白之傳我無憂矣我從  
宦以來常自節嗇恐習於豐腴我兒他日弗能供也嗚  
呼先妣所望於不孝者何如慈訓諄諄言猶在耳嗚呼  
痛哉今年十一月二十六日感寒作嗽兼患脾疾服清  
補數劑勢稍減猶處分家事如平時十二月八日晚忽  
患痰厥次早神略清而飲食竟不能進醫家謂脾胃兩  
傷補救無及不孝倉卒憂惶籲天莫應延至十二日子  
時溘然長逝嗚呼痛哉此皆不孝侍奉無狀致罹慘酷  
一至於此嗚呼痛哉罪大惡極天降殛罰不於其身而

乃奪其親十年之間連失怙恃使長爲無父無母之人  
嗚呼痛哉不孝其何以爲人哉不如死之久矣先妣素  
明察人不能欺襄府君內政未嘗與外事然遇疑獄於  
退衙時相與辨論悉中窾要閩清有訴女爲人養媳姑  
虐而投河死者以雙履在岸側爲詞先妣聞之曰是遁  
也乃故遺此府君遣役蹤跡之果獲於山坳中吳橋俗  
鄉農婦女率於正月期會入謁內署先妣請府君諭止  
之而俗已百年不可革乃約五十以上者得來每村毋  
過三四人至期受謁詢其衣食教戒切至見者肅然少  
時授讀女孝經半部遇他書卽能成誦尤熟於詩嘗課

不孝輩讀少陵詩或案頭無本口授指畫一無誤國  
朝若梅村漁洋竹垞諸大家集中長篇鉅製悉能記憶  
好談遺聞軼事每命不孝數典有未晰爲講究始末雖  
憂愁疾病中未嘗廢書亦藉以自遣今年十一月中猶  
閱漁隱叢話一過中年時作詩半已棄置今僅存遺稿  
數紙不能成卷南歸後亦遂不作時遇答親戚存問書  
命不孝執筆坐於旁口授草稿筆不得停南歸後事六  
叔祖父母惟謹去年五叔祖告歸問安亦惟謹謂不孝  
曰吾不得逮事尊章常以爲憾今得事叔翁姑是吾福  
也小時最得外王父母歡十三歲後連遭外王父母之

喪過時而哀每曰吾嫁時兩家父母俱不及見至今思之有餘痛也外王父家素豐厚二十年來舅氏相繼謝世家業中落先妣南歸後諸從母時過從敘情話而振觸往事時傷懷抱四五年來遇外王父母忌日必祭於內室謂不孝曰禮無祀及外家者然爾中表兄弟或奔走四方或且不能自食其力春秋之祀幾闕吾爲此所以通禮之窮也亦盡吾誠而已好拯孤苦及方便事病革時聞隣嫗寒猶曰當爲謀棉衣每年施普濟堂棺木十具曰我力有限然此雖甚貧典質亦必爲之御婢僕輩嚴而有法疾痛視之如所生不孝輩或坐立欹側衣

服污損誦讀不朗徹言語無次序必令跪於前重撻之  
叱使退察其能自悔悟歡笑如常意乃解不孝娶婦後  
言動或失當亦不少寬假或終日不與言必痛改而後  
已嗚呼痛哉先妣所以諄諄訓戒者蓋望不孝之有所  
成立也而不孝忝顏食息孤負親心清夜自思撫躬內  
愧尙忍言哉尙忍言哉視異腹兒女均平如一不知非  
已出病亟時顧不孝曰幼妹未嫁以累爾矣盡力爲之  
餘無他語嗚呼痛哉遺訓在耳今竟不可得而聞矣嗚  
呼痛哉先妣生於乾隆二十五年九月初八日寅時歿  
於嘉慶二十年十二月十二日子時享年五十有六

覃恩誥封宜人子女具府君行述不孝苦次昏迷語無  
倫次伏冀當代大人先生立言君子賜以銘誄昭垂不  
朽則不孝世世子孫感戴無旣不孝孤哀子錢泰吉泣  
血稽顙謹述

秀水金衍宗填諱

文端公遺事

十九則

公少讀書至說命泣下不能語陳太夫人異焉公跪而  
言曰君臣遇合至於如此是以感泣也

行述

公幼時家貧隆冬天未明卽起讀書無薪舉火熱水汲

井泉盥手膚爲之坼

詩續集卷三注

十七歲依檀溪俞公於京

師助編摩事冬無裘晨興作楷手凍裂潛入市以錢三

百買皮袖手自綴於絮袍鈔書益力

詩集卷二十八注

二十四歲

春自京歸里課兩弟讀書於南樓去梯級縋繩送飲食  
歲除始一下樓如是者二年公姿性過人八歲讀四書  
日四十行九歲讀尚書日百二十行皆數過卽成誦而  
力學猶如此

年譜

朱竹垞李秋錦分虎彭羨門諸先生嘗集半完圃賦積  
雨詩公纔十一齡賦五古一首有蚯蚓長於蛇薜荔陰  
似鬼之句諸先生極賞之羨門先生曰此子他日當以  
五古名世及之京師查初白先生見公詩擊賞不置曰  
吾浙詩人他日當以錢子追配竹垞時舉詩會同館以

詩名噪京師者多未延致獨邀郭君元鈞及公二人年譜及自跋詩冊墨蹟

公嘗請益於徐華隱先生曰何以博耶先生曰讀古人文就其篇中最勝處記之久乃會通後述於竹垞先生先生曰華隱言是也世安有過目一字不遺者耶公嘗舉以爲讀書法

賦彙錄要序

公年十五從陶先生曰襄學先生爲公從叔商隱先生高弟博通經史立講經法以課公命注易曰一卦乾坤二卦分十日注隨所見爲注不背經義而戒勦襲又命公與二弟講經書有未當者指而訓之公嘗曰我蒙



恩充經筵講官每進講凡執事閣中者皆曰聲音爽朗  
舉止安和雖老輩不及也得力有自來矣先生每教公  
讀古詩及李杜集又躬率公兄弟習灑掃應對進退之  
節每持帚掃地必背吟所誦詩

文集陶先生傳

公年十四應童子試鶴庵公以公嘗育於外大母因命  
名曰陳生及鶴庵公易簀前三日夢五世祖謂曰爾一  
生長厚力學功名未顯爾二孫前生乃太邱孫也遂召  
公定名

年譜及自跋所書三槐堂銘冊

公總角時隨祖父訪盛高士大鏞於匏庵留數日高士  
取案頭涑水集相遺曰子貌清厚他日當以文章事業

名天下此集幸留意焉後二十年公爲翰林假歸重訪高士於南湖之濱問曰涑水集尙在篋否對曰已披閱數次矣

文集盛高士傳

公三十二歲於津門旅寓聞太夫人疾憂甚適洗面嘔血盆水盡赤宋監司師曾素重公資贈回浙及抵家太夫人已愈相見歡甚

年譜

康熙乙酉

聖祖仁皇帝南巡公於吳江縣境跪迎獻時巡詩五言律二十首奉旨於迴鑾時與江南獻詩者同候召試旋以太夫人病不赴試癸巳恭逢

聖祖六十萬壽公獻頌一冊安溪李文貞閱選入高等  
及辛丑成進士引見時公奏履歷蒙

溫諭云朕乙酉南巡汝曾獻詩何以至今方成進士公  
奏云科第早晚自有定分今得仰蒙

皇上教育便是萬幸

氏顏甚霽卽選入翰林

年譜

雍正己酉有

旨各舉所知有鄉人素諳吏治將錄其名移知選人矣  
其人未之知也詣公通殷勤卽焚薦牘而以第曉村公  
名上

文集與弟札

公充陝西化導使時自涇州晨發居民文進義拾道旁遺金二十餘兩覓失金人不得卽送州牧處曰不敢負錢使君也州牧知爲公僕人所遺因具揭道始末公致書許中丞屬旌獎焉

行述文集與許中丞書

公在陝西遍歷兩河勤宣德意公餘集諸生中好問勤

學者就公廨講經明習吏治多所成就

汪文端跋公與黃君兄弟札

黃君建中父過講堂見諸生環立聽講士庶人孝章伐

木常棟小弁諸詩有流涕者因遣建中兄弟受業

文集壽黃

序後建中歷任江左著有惠政部民祀之

汪文端跋

公與建

中兄弟札先後凡五十紙爲諸生則勉以潛心實學臨

民則助其勤政愛民凡遇人接物悉本乎天理合乎人情近裏著已布帛菽粟真可坐言起行

陳文恭跋與黃君札

凡與

子弟及交遊書亦然雖極忙中必累幅連篇勸勉懇至今尺牘存集中者十之二三也

公奉使包引所肩行李必親爲衡舉輕重曰我能勝者若亦能勝也

行述

公通籍後謾擬文字屢蒙

憲皇帝激賞而久未遷擢雍正九年

特召諭曰朕看汝將十年今日方知汝真是安分讀書人不數日由贊善擢庶子又五日擢學士其明年

命視學順天或言公嘗寓天津恐有瞻顧

憲皇帝答諭曰此人諒不至此後數月考畢天津入都  
召見獎賞曰我早知汝不負我也

公與蔣石宗伯手札

公視學畿輔時有題帳詩一時傳爲美談詩序云往時  
學使者下車供張甚盛厥後相繼簡任於此者多清節  
素著之前輩以次刪除唯臥室內設一帳寒則禦風夏  
避蠅蚊余前後視學於此凡七年泣瀝郡者四將行必  
撤帳歸所司曰明年來無煩改作也辛酉春復來見帳  
極新因識數語並綴以詩知繼余而役於此者必朝右  
君子慎乃儉德有同志焉詩云不寢常如枕有警屏

私直似鏡無塵題詩自有紗籠護留伴他時絳帳人

詩

集

諸城劉文正初釋褐以所業就正公謂文正房師王樓  
山先生云吾賀子及門得偉器他日令僕才也金壇于  
文襄方爲孝廉時公卽異其才劉文正及錢塘梁文莊  
俱以筆法自詡公曰二君毋高自位置會看賢郎跨竈  
耳謂山舟先生及文清相國也後皆如公言

行述及詩  
集注

公嘗作九思箴手書屏閒以自觀省以訓子孫云淑慎  
爾身君子其人思則得之云何勿思爾有視聽明聰則  
正惟溫而克惟恭作肅言忠庶可復也事敬如執玉也

芻蕘可詢蓄疑者愚忘身及親忿可不懲歟逐臭者役  
貪利者墨其目惟九唯思則一其敬受之循循焉聖訓  
是率平生所奉格言聯語以訓子孫及門弟子輩如自  
下則人莫能踰謙之六爻皆吉內省而心無所疚恕乎  
終身可行自待重則一毫不敢苟且爲學勤必寸陰勿  
使怠荒知足則遇自安知不足則學日進惟讓則步不  
失惟不讓則仁可當又好引范堯夫惟儉可以助廉惟  
恕可以成德周元公淡則欲心平和則躁心釋數語又  
喜書趙清獻無一事不可告天司馬溫公無一事不可  
以對人語及寢疾猶道之不去口每寢疾人來問疾輒



與誦啟子足啟子手數語疾少閒則曰吾若未填溝壑  
且仍誦戰戰兢兢三句矣易簣時制軍鍾公方入覲過  
禾候公公口占絕句贈行曰予近易名典君方述職時  
平生不疚處猶有故人知

行述

公幼時卽愛錄忠孝故事至廢寢食客有問曰公書何  
如松雪華亭公曰不及也然則流傳修短何如曰過之  
兩公所書多風雲月露及內典諸經余唯以樂道人善  
自勛且以勉人世有感者雖數世子孫守之矣不亦遠  
乎

文集自跋忠孝故實

公少侍王父鶴庵公母陳太夫人得畫法而不常作乾

隆丙子盧雅雨都轉製屏十二幅畫者皆七十以上致  
絹乞公畫因走筆畫松梅并作長歌以紀之又嘗爲盛  
百二先生畫袖俱見詩集袖卷今在曾孫希憲所

先府君遺事

五則

泰吉嘗聞沈味蔗舅氏稱先府君居官之廉府君答之  
曰我小時卽知財貨出入有定數不可苟得也六七歲  
時夢探庭樹鳥巢得穀十以奉貞孝馮太宜人逸其二  
明日有親戚長者至贈銀十笏以奉太宜人卽日用其  
二與夢適符焉

香巖族兄貽穀言先府君去閩清時送者塞途人執青

竹竿繫紅綢丈許映日燦爛若旌旗然府君嘗折疑獄  
禱於城隍神日中無雲而雷囚震懼盡吐實亦香巖兄  
言惜獄之始末不能具

姑夫蒯鐵厓先生嘉珍至吳橋見府君薄莫決獄坐甫  
定顧左右曰告司城者當留門及訊畢謂兩造曰曲直  
判矣速歸爾鄉毋宿城中使家人久望也又謂鐵厓先  
生曰每日牌示何時審訊者不可過期亦不可不及期  
庶兩造得飽食以待先生嘆府君愛民之深屢爲泰吉  
言

從父中丞公言大興人山西候補同知王某身家不清

爲人訐發以重金爲壽屬要人通殷勤欲爲具結言王  
某實無他故府君堅持不可府君廉潔自矢多類此

族孫聚仁應順天鄉試同號吳橋縣學生某詢知爲府  
君族人意甚款洽爲言府君去任時縣民所留犍尙供  
奉城樓嘉慶庚辰泰吉之濟南同行陳君之御車者吳  
橋人也謂泰吉曰是吾錢公子耶吾不及見錢公吾鄉  
之老者時言錢公好官也泰吉爲之感泣嗚呼府君之  
遺澤留於民心者逾二十年而猶若此其不忘也耶

右皆泰吉二十年來所聞見者謹件繫以補行述  
所未備

甘泉鄉人稿卷十八

甘泉鄉人稿卷十九

嘉興錢泰吉輔宜

張北湖先生事狀

學使新城陳侍郎承先世正學之傳所至以表章[涇]儒  
爲首務初涖吾浙卽訪求海昌祝人齋孝廉遺書旣得  
其詩文授之梓人齋有哭張北湖文學使讀而慕之欲  
考其言行爲之立傳泰吉乃從管生庭芬所得北湖之  
子京顏所次年譜參以州志儒林傳謹撰事狀以獻  
北湖名朝晉字莘皋晚自號北湖學者稱北湖先生先  
世本陸姓系出宣公明初有字均輔者自嘉善縣贅於

橫山張氏承其姓祖德孺遷海昌之硤石鎮遂占籍焉  
六歲謁祖姑徐賜以新衣卻不服父默庵喜曰此子立  
志不凡十二歲補弟子員十三歲居父喪讀儀禮經傳  
溫公書儀文公家禮參考異同造次必依於禮三十八  
歲居母朱碩人喪勺飲不入口從母諭之曰若不勝喪  
獨不爲先人大事計乎乃強起食粥以治喪迨營葬事  
歐血數升仆於地良久藥之而甦服除遂不就試曰向  
者冀老母得祿養爾今博科名何爲者於戲此北湖終  
事父母樂志肥遯之大略也海昌有老儒范鯤蜀山者  
早歲棄科名潛究洛閩之學得桐鄉張楊園遺稿讀之

曰紫陽後一人矣因編次其集行世北湖少從蜀山遊  
卽手鈔楊園全集讀之謂言行見聞錄乃古聖賢畜德  
之功子朱子序小學而以嘉言善行終篇大學之格物  
中庸之擇善率由此道也學者觀此編其於樞機倫物  
之際有以得持循用力之方矣乃刊板藏於永思樓永  
思樓者北湖奉先世神主之所四時之祭必前期齋宿  
忌日則素服致哀凡祭器及儒先手跡經史諸書皆藏  
焉暮年不戒於火急登樓從烈焰中抱神主以出言行  
見聞錄板及自著省克錄聞喪雜錄六有齋劄記讀書  
記疑讀史記疑手稿多燬惟所輯楊園未刻稿存北湖



既服膺楊園之書由楊園而推之當湖知其同源而合  
流晚年猶手寫衛濱日鈔以教學者曰知之非艱躬行  
爲急君等事事以清獻公爲法方有據依也自題臥榻  
右柱曰臨牀伏枕須思一日所言所行差謬否左柱曰  
夜半眠中或起妄想披衣起坐豁然退聽友人褚惠公  
見之曰此山陰慎獨之功也不愧衾影莘皋有焉又言  
治病之法當理其心動靜以敬心火自定治怒之法克  
己爲先否則凝冰焦火未易消釋其答友人書云朱子  
爲學之方窮理以致其知反躬以踐其實居敬者所以  
成始而成終也致知不以敬無以識義理之歸躬行不

以敬無以致義理之實持敬之方主一無適勿貳以二  
勿參以三終日儼然討論典訓存此心於齋莊靜一之  
中窮此理於學問思辨之際思慮未萌而知覺不昧事  
物相接而品節不差不安於偏見不急於小就而爲學  
之功成矣立家塾以課族子弟期望必令倍誦小學近  
思錄合格者勞以紙筆嘗曰孝經小學自幼至長當日  
夕循誦今人往往忽視小學缺此一項功夫先儒云小  
學一書當敬之如神明奉之如父母此言豈欺我哉清  
獻公教人讀書必以小學爲根本其遵行之毋怠於戲  
此北湖參匯桐鄉當湖以會歸於考亭之大略也楊園

嘗仿德清唐灝如葬親社約遠近多遵行之北湖於三十年中三舉葬會貧士得葬者九十餘家有佃客將貸金飯僧火其親北湖切責之開陳懇惻佃客感泣因示儉葬法與金以成事寺僧聞北湖言亦悟火葬之非乃教以窆生骨法用漆肆中舊漆桶藏骸骨以漆封蓋實築灰沙後頗有踵行之者創望墓祭田以祀始祖及二世墓地之失考者立仁孝園以收族之貧不得葬者其措置規條大率本之楊園楊園後人五棺未葬乃約同人印行蜀山所刊全集得數十金屬姚希顏董其役製棺以贈楊園側室陸氏楊園嗣孫文相貧不能娶醵金

以助冢媳姚節婦卒率錢祔葬楊園墓側於戲北湖之  
於楊園未嘗親受業其門也旣志其學而師法之又周  
恤之如此此非特可以式薄俗也亦足見正學感人之  
深而以儒林宗派而論北湖之於楊園不異其適嗣矣  
且夫楊園當明季異學充塞之時確守朱子之學以深  
明乎天人合一之故而力踐夫道器不離之實與淩渝  
安沈石長我家商隱先生切劘究習於荒邨僻壤中毅  
然以繼往開來爲已任然未嘗號召生徒通聲氣於四  
方也苟聞而興起者無蜀山與北湖之深知篤好以廣  
其傳則雖任道力行如人齋者何自而得私淑耶蓋人

齋之生後於北湖已三十年其去楊園稍遠矣卒能蒐輯遺書闡發義蘊者北湖啟之也北湖卒於乾隆十九年四月十九日壽八十三道光十有四年冬十二月朔海甯州學訓導錢泰吉謹狀

孝廉方正李先生行狀

先生姓李氏諱穀字中玉號介石先世自江陰遷嘉興梅會里遂爲嘉興縣人曾祖父諱陳常康熙癸未進士由刑部主事官至兩淮巡鹽御史祖諱宗信邑庠生世父勤早世先生爲之後父諱淦乾隆丁酉科拔貢生癸卯科舉人有孝行桐鄉馮侍御浩爲作傳先生逮事大

父暨本生父母極孝謹年十七母金太安人病甚篤倉  
皇封左肱和藥得漸瘳歲甲辰孝廉公應禮部試歸邁  
危疾先生更封右肱配朱安人亦封肱燂湯以進卒不  
效呼號擗踊哀毀盡禮先是李氏有封兩肱以療父母  
疾者先生從祖祖父宗仁也及先生之事稍稍聞於人  
人咸謂李氏多孝子云嘉慶元年 詔舉孝廉方正之  
士引 見錄用泰吉從兄裴山中丞楷方以戶部郎家  
居聞郡人爭述先生孝行乃言於知府伊湯安公學政  
阮公以先生名達於巡撫先生客揚州未之知也方是  
時巡撫屢更當上奏者憚於保任先生乃由廩膳生與

同舉十一人並請 賜六品銜不引 見人咸爲先生  
惜而先生益欲然懼名實之難副蓋自是終其身常欲  
然也先生與人交和厚坦易無崖岸城府人多親之然  
不可干以私常爲餘姚閩縣試文有以重金請託者毅  
然卻之於溧陽亦然久困場屋境日窘常客授以自給  
年七十嘗一目乃養疴於家賴季弟河南延津縣知縣  
璫以舉火而長子得心疾甚劇次子甫娶而天晚歲處  
境皆人所難堪者先生則藉吟詠以自遣先生之詩本  
乎家學根乎性情覽物興懷悉寓篇什自定介石詩鈔  
若干卷少喜肄書初學張文敏後得褚書枯樹賦舊拓

本暇輒臨摹筆法益蒼勁人爭求索至老酬應不倦有以潤筆進者時呼酒一醉焉嘗纂人海韻編二十年而成蠅頭細書數十冊藏於家少多疾病中年以後養日遂體日充歲時出遊可步行十餘里性愛竹遇茂密處流連不能去曰安得買一廛於竹閒我將終老焉先世有師竹齋失之久矣因爲圖以寄意然卒不得遂屢遷其居益湫隘處之怡然人謂先生嗇於遇必將豐於年道光二十年年七十有六秋冬之交寒疾數作十二月十九日晨起櫛沐易衣謁家廟跪起如常夜過半而逝二十日也適叔弟琥自河南歸遂經紀其喪先生聘張



氏涇安縣教諭大德女配朱氏國學生執桓女繼馬氏  
國學生會雲女側王氏皆前卒子四文杰候選從九品  
文誥文樸爲從父馨後文楷女五一適錢塘翁亦清一  
適同里徐芳春一字松江蔡景福未嫁守貞一適同里  
張富善夫亾以身殉一適同里曹作嘉孫男二泰吉年  
十六始得受教於先生世父戶部公舉先生孝行以勵  
泰吉先生曰我少時習見我父之事我大父安能逮萬  
一哉語次輒泣下暇時捧一編循環諷誦嘗撫卷太息  
謂泰吉曰此我祖我父所鈔唐宋及國朝諸家詩也  
我所讀書多先人手寫口授者我父歿二年大父謝世

家日益貧懼不克負荷與兩弟篝燈匱旁讀夜深乃寢  
迨諸弟授室後稍稍能自立而我精力日孱弱不知得  
讀父書有幾年耶泰吉聞先生言亦感泣其後二十餘  
年又得侍先生於海昌則前所讀之冊猶晨夕不輟也  
聞泰吉道刲肱事蹙然曰子勿言我未讀鄆人對耳聞  
嘗謁先生於所居見先生事舅氏金丈焚帷謹金丈老  
無子先生請與同居及歿爲卜葬皆當先生極困約時  
嗚呼先生推愛親敬親之心以愛敬其舅氏老而益篤  
嗚呼先生之質行信難能矣泰吉嘗爲先生圖贊其大  
略云先生之孝著於閭里達於

天子氣類之感一門怡怡女爲貞女婦爲女師謂朱安人及字蔡氏女也識者謂無愧詞焉其後數年張氏婦又以節烈著嗚呼天若以困厄先生者并及其女子子而卒皆自立以無愧於天世之處困輒紉者漫然諉之曰天之厄我乃至於斯也盍亦觀先生之善全其天性化行於閨門爲何如耶泰吉用敢撰著行狀以諗世之知先生之無愧於天者

湯溪縣學教諭沈君行狀

道光二十一年湯溪縣教諭嘉興沈君紱齋謁告將歸湯溪人重君學行爭挽留主講九峰書院君去湯溪亦

無以爲家不得已應其請乃增設規條於制義外課經  
解策論詩賦且爲講經及小學書君嘗主泰州書院亦  
若此其勞無異爲校官時數年以疾卒道光二十五年  
正月九日也年六十有五其年四月次子敷桂以縣學  
生祝光烈所爲事略及君所刻勸設祠倉議減釀備荒  
說施衣集存信錄湯溪縣節婦譜孝子譜示泰吉於杭  
州屬爲家狀祝生敘述翔實君所施設皆可師法乃不  
敢以不文辭謹詮次之曰君諱寶麟字孔珍紱齋其自  
號也曾祖諱近仁江蘇儀徵開官濬河必避民墓人咸  
德之祖諱增爲錢塘桑弢甫先生高第弟子乾隆甲子

舉人中乙丑會試明通榜甘肅崇信縣知縣考諱振鵬  
乾隆庚子進士直隸豐潤縣知縣兩世皆有惠政豐潤  
君生子二君其長也年十八舉嘉慶戊午順天鄉試道  
光丙戌大挑一等改就教職其同志友金衍宗岱峰語  
泰吉曰紱齋累世循吏其爲人精勤亦有治縣才乃辭  
避不爲與我同何也然爲校官必若紱齋者始稱職爾  
戊子選授湯溪是時我從兄棧雲壽爲武義縣教諭平  
湖方垌子春佐之兩人皆持躬謹教士勤於是金華士  
論僉謂錢方沈爲嘉興三夫子云我兄及子春皆遜謝  
曰紱齋非可幾也君初至湯溪卽修灑掃職殿庭無積

塵雨則周省視有漏痕則旁皇若無所措曰我室完而廟屋敝漏我何衣食於此繕完乃卽安邑人聞之皆感奮相率新兩廡及名宦鄉賢忠孝節義四祠並及先農神祇壇君倡之也尊經閣藏書殘闕者借鈔購補多精整撰文廟祀事考上稽

大清通禮諸書以正湯溪沿習之誤兩廡位次及釋奠儀節器數考定惟謹前期必變食及祭必潔必虔其辭職也自謂精力衰恐跪起或失儀爲大不敬云君治己甚嚴接人甚和待士甚恕當官理案牘纖微皆稽例有問者輒縷舉曲折無遺例所不可者以義斷之眾莫能

奪武生葉某爲富家訟審其枉釋不問富家控之府檄縣移學禡葉某矜君請集兩造讞之縣不可府又檄如初同僚曰拂知府意且得罪君曰忤知府不過奪我官我終不以一官故枉人罪府縣凡七檄而葉某卒不禡廩生某病狂其父得錢於待廩者爲某請給衣頂君廉知之執不可曰爾子疾愈必悔之固請叱之曰利乃能移人父子情乎我必不可無何某疾瘳其父亦悔悟縣賦地丁銀民舊折錢以納有定數會銀直昂縣將增納民錢君勸止之其長泰州書院時知州議增院租以裕士止之不可則曰書院者將教士以學道愛人爲他日

臨民用可先示以剝民自裕乎必欲增吾請去議乃罷  
君生平辨別義利侃侃不苟同類如此乙未夏大旱奉  
檄勸分人皆曰沈夫子至吾邑八年口不言錢今者爲  
一邑民命計吾儕可不力由是樂輸者眾凡飢民之簿  
籍錢粟之斂發期日之疏數縣尹屬君總其成鉤覈籌  
畫民困得蘇而君自禱雨至施振憂勞幾半載遂得嗽  
上氣疾鬚髮斑斑矣有益於民生者猶力疾勸行不稍  
怠邑士益信從之勸設祠倉議諸書皆次第行之而有  
效者也其書已刊行君敘例極詳故不具往歲癸未浙  
西大水自泰州急歸省父墓著省墓日記述所見水利



廢壞及野殞漂流有足爲世鑒者外舅崔公分巡河南南汝光道時爲撰南汝光水利志十卷蓋自其少時卽究心郡國利弊期有濟於世行之湯溪者一二端爾所蘊未盡展而湯溪人已厚被其惠稱頌之不衰祝生述其父言爲諸生六十年所事學師甚眾未有若沈夫子者卽縣志列明以來官師數十人不過一二人若夫子耳其言良信然君晚歲讀儒先書自治益力每嘆曰吾自省生平內疚實多也所爲詩古文詞必期實踐不苟爲高論嘗研究苟爽易爲圖說未竟藏於家娶山西崔氏乾隆甲辰進士河南南汝光道景儀女中歲以疾盲

相敬數十年子三對薇敷桂應梅皆庠生弟慶齡力學  
早世應梅爲之後

胡藹人家傳

君諱際盛字黼明號藹人國學生候選布政司經歷先  
世當明崇禎時由歙縣遷嘉興及君七世矣君之高祖  
諱守仁字儆庵爲屠處士東蒙女夫竹垞朱先生序東  
蒙詩集謂鏤板請序五返而益勤者君曾祖也諱之溶  
字典在附貢生典在公長子國學生諱廷錫字容庵容  
庵公子三人君考國學生贈承德郎曉林翁諱斌其叔  
也妣馬太安人同里馬公振廷女亦有丈夫子三長名

一飛字上扶國學生次名敦敏字慕徇附貢生其次卽君君於兄弟姊妹行爲最少父母劇愛憐之曉林翁闢書室於所居之東北時休息焉君就傅翁寢處不離閱數日則挈之至老屋笑謂馬安人曰幸視若兒無恙也先後受業者爲吾從兄學山廣文馬淡于曹種水兩明經能謹承指授朱弱冠曉林翁卽世乃棄應舉業與兩兄勤治生鄉里善舉靡不與也司會計友某以暴疾卒君爲棺斂周給其母妻無厭倦歲癸巳馬太安人八十八生朝兩兄已前卒太安人遵曉林翁家誠謝稱觴適里人重建放生橋乃捐金成之君旣早失兩兄與諸姊尤

友愛子婦與君齒相若旣嫁而誼益篤及來海昌歲一  
歸必招莫氏駱氏姊歡笑無閒今年春喪駱氏姊余婦  
往省握手涕泣豈意未數月而君亦逝耶時爲道光二  
十四年七月二十日也春秋五十有三君平居常語其  
姊曰我祖自五十歲後節縮所入脩先塋置祀田次第  
畢舉今我宗族歲時上冢不替者皆吾祖三十年所經  
營而定者也我亦將效我祖之所爲君歿後君之子京  
昌亦舉以語余且謂君將刊種水詩文集未果京昌必  
當成父之志余於是益嘆君所志之善也余爲胡氏婿  
侍曉林翁未逾年聞胡氏長者傳述其生平雖瑣屑之

事多合禮意有足風世者侍馬安人最久嘉言懿行見聞爲稔君兄弟承家訓皆馴謹長厚上扶慕徇歿已二十年兩房子姓皆勤學力行君之子亦有聲於庠蓋自數十年來默數吾鄉之能守詩書之澤馴行孝謹繼世不改如胡氏者指不數屈也君娶王氏生子一卽京昌嘉興縣學生候選訓導女一適秀水沈燾京昌乞爲家傳乃詳次之如左

贊曰昔倣庵翁六十生朝謝絕賀客率兩子侍東蒙處士與其友巡太湖之濱登靈巖光福支硎諸山遍厯梅塢飯僧於鄧尉而還處士紀之以詩余讀鹿千草堂集

知胡氏家法由來遠矣君能承先人之志而天靳其年  
所志未遂惜哉

陸繹亭家傳

海昌彭墩陸氏系出宣公宣公七世孫評事忻始居山  
陰九傳至元高士伯玉自山陰來遷焉高士之七世孫  
儼始分居祖宅南齊賢里今又十數世矣世以耕讀重  
於鄉而尤推繹亭君爲耆宿云君諱邦詹初名蓮字華  
峰繹亭其自號宣公三十二世孫也祖弈觀父世堪皆  
太學生君甫冠而喪父孝事母金孺人至九十五而終  
君雖老嬉戲娛母如兒時有妹適朱氏亦老矣時來省

視母子三人皆白髮俯仰言笑見者咸稱道以爲至樂  
君妻俞亦能助君盡色養人尤以爲難君性強記多識  
舊聞再應府縣試不售以國子生應鄉試又不售乃棄  
去而力教其子若孫從兄允恭爲佃農所困辱懦不能  
校君挺身爲之理雖困辱卒得申族人寒無衣死無槨  
助之謀汲汲如恐不及有不善正顏規之不少寬俞孺  
人旣能孝養其姑又助君理家政教子孫以及其族之  
子婦陸氏聚處數百人不失家範者君夫婦教養之力  
居多君有子二人長用霖次濟舟濟舟早卒無子孫齊  
壽廩膳生曾孫五人思勛思勗思劬思劭齊壽與

思勛告游州庠與余善

贊曰道光十年夏有爲余言彭墩陸繹亭翁年九十矣猶能於燈下爲子孫講說勸善書晨起必手寫數百字以爲家誠心敬異之將往訪焉而君遽謝世今君之孫纂脩家乘以行狀乞爲之傳余於君不得一見聞其美行爲之歎息君之族有婦殉其夫而夫之妹終身不嫁與弟之婦共撫遺孤以成其家者余爲之撰義門記其殆聞君夫婦之教誡而能然歟於戲若君者信可爲陸氏之耆宿矣

秀水二張孝子傳



張淮字錦華居蹲賓橋側粗識字爲人收田租余喜其樸直亦嘗任以事夏日解衣見臂癰驚問之乃知少嘗刳肱以療父疾也我宗特齋先生與之鄰爲言其侍父狀益歎異之錦華父邁心疾思食羊市中所殺不食也錦華則買羊殺以食父思出遊則賃肩輿侍以出窮日而歸父疾數年凡所思百方致之不稍怠而錦華衣不完食不飽及父疾篤醫言必死錦華乃刳肱而父卒死同時百福巷有衣工張廷標者節傭所入爲弟娶婦而終身不自娶養母甚孝常效市中兒嬉戲狀以娛母一日鄰家火負母出急遷祀先之具而不及他器用我世

父戶部公聞其事歎爲合禮以是人皆稱張孝子二孝子廷標年差長道光初年卒年六十餘錦華後數年卒年五十餘

贊曰二張孝子之事余心誌之餘三十年咸豐元年九月遂安洪秀才自含詣余訪求海昌孝子將爲之請

旌表余旣從州志備志錄四十五人以上於大府矣思二張孝子事我鄉今鮮知之者乃爲合傳以告秀水學官冀有聞焉嗚呼以余號稱士人欲若二孝子之事親可幾及耶

蔣節母徐安人傳

安人江蘇吳縣歲貢生徐宗暘女年十八爲浙江海甯州監生蔣星緯繼妻未踰年星緯死閱十年星緯弟星華生子光煇安人子之光煇生四年星華又死無他子安人與星華妻曹共撫教之而光煇視安人不啻如所生以甫彌月卽育焉恩義尤篤也安人之子光煇也星緯父[涇]村翁遺命也星華甫有子而死而未有他子[涇]村翁不及知也議者謂星緯庶長也星華嫡子也繼禰之宗也光煇爲星華後而於星緯夫婦從兼祧小宗父母服期年之律乃宜安人間之大以爲然是時光煇有三子矣請命於姑立光煇子拱垣佐垚爲星緯孫而爲

光熉更定兼祧小宗父母之名余方爲州學訓導與學  
正董君以安人守節合年例宜旌表詳列事實上大  
府請達於禮部及旌旨下如所請以故光熉定爲星  
緯兼祧之子而爲星華後與余往歲所撰海昌備志列  
女傳之文異余嘗質於通人曰無嫌也當爲後與不當  
爲後禮也律也爲後不爲後異母子之情不異也安人  
之恩義與光熉所以報安人者不繫於爲後不爲後也  
且律文定其名曰兼祧父母固許兼爲後以通古禮之  
窮也後之人讀州志與蔣氏譜牒之異文而深思其義  
可以見安人不牽撫育之私恩於光熉冠昏有子之後

更定兼祧尤爲賢明婦人之所難也咸豐三年四月癸巳安人卒余乃詳著之俾光煇列於家乘安人之嫡姑余族兄之女孫也夙聞道安人某事某事合禮法余謂安人能明大義則其他於安人皆小節故不具

贊曰余嘗讀東晉賀喬妻于氏上表以所育喬兄之子率欲還所生立六義十疑以伸長養之功卒爲朝議駁正益歎徐安人不恃鞠育之恩爲奪宗之論之難能也於戲若徐安人之事禮家通儒考論宗法者當有取焉

朱節婦張氏傳

張氏陝西榆林人乾隆五十二年海昌朱維堃客蘭州

納爲妾未幾有身維塋遭危疾頻歔歔曰家貧無子客死遠方身不足惜痛心者若敖餒而奈何疾革曰張不瞑氏刺血自誓乃瞑遺腹生子氏父年七十餘矣挈氏母子舁匱行長途哀號乞錢竟得達維塋家維塋婦某氏悍不利其母子歸虐之甚知氏志不可奪潛許某婚突縛劫之至中途鄰比聞號呼救解以歸維塋有姊適周氏孀居守正氏乃挈孤子從之以居周氏姊旋卒氏益子立益矢節撫孤無貳志屢至絕粒庭梅熟時強咽以充腹張而卒年六十六道光十一年也維塋姊夫兄之孫山東城武縣知縣周樂清聞纂修志乘遠寄其事

屬爲之傳志館諸君子諗其事者皆曰其信因相與道氏艱苦之狀幾爲之流涕嗚呼氏抱堅貞之節數十年之死不變固無愧於死者矣遭困辱而益彰奚憾焉其父能成女志辛苦跋涉以歸維塋之喪蓋亦有士大夫所難能者

張節婦王氏傳

節婦王氏張惟榮妻州城東三里橋人年六十九矣其女金姬傭於學解時來視之知其二十九而寡例旌節婦也問其生平則嘆曰何爲哉我子四歲而孤稍長充海防營兵年三十九與其婦先後死長孫年十八尙無

成我何功於張氏而何言哉何爲哉嗚呼王氏鄉婦也  
所言若是可錄已夫天理人情之至不待教而能而廉  
恥之心人人自勵兩年來志館所錄節婦不下千餘人  
然鄉曲苦志若王氏無人爲之傳述又不欲自表襮不  
爲志乘所錄者當不少幸而王氏來視其女始得知之  
耳急著之以冀類於王氏者人爲之傳述不至泯沒云

### 郭烈婦傳

烈婦鄴氏郭士壹妻士壹爲貢生夢元孫氏父作梅亦  
舊家皆貧甚氏性柔順士壹病瘵數年侍湯藥惟謹道  
光元年六月士壹疾篤顧氏而歎曰我死無子家又貧



甚爾何以自存氏曰我志已定矣士壹遂無語氏有弟時來視士壹疾一日氏語之曰明日早來視我弟謂士壹必死姊招其佐喪耳不意姊之將死也諾之是夕氏服滿死士壹疾已革逾時死亦不知氏之先死也朱孝廉景春至志館述其事或謂氏於士壹未死時先死疑非禮之正然士壹病已數年氏侍養不怠苟士壹萬分之一可不死肯先自絕哉冀夫之生不可得先自絕以明志氏之心亦苦矣何議焉

### 宋節母傳

宋節母者樗里詩人樾之大母也宋氏居高家橋在州

城東四十里母爲北村處士陸逸庵女年十八而嫁性  
仁恕妯娌臧獲交稱其賢嫁四年而夫美安卒子誠齋  
甫三齡撫教之至五十七歲而卒氏後誠齋六年卒爲  
嘉慶丙辰壽八十有一長孫樾已以樗里詩人名於時  
隱居深村博聞強識不求仕進大母教也宋氏於鄉里  
中號饒裕寒者與衣死者與槨勛其子無厭倦助修橋  
梁廟宇歲常有之晚年多死喪之戚家稍落長齋禮佛  
泊如也子孫欲以苦節達有司輒戒止之以故乾隆丙  
申脩志時守節已逾四十年未及采列道光丙午樗里  
年八十有四仲冬臥病聞備志將告成力疾撰行述寄

志館乞爲立傳信宿始達而樗里卽世矣樗里所述簡質可信乃急著於篇嗚呼世固有苦節終其身不欲聞於時者是在文學之士各就聞見詳誌之以勵婦行以示來茲爾志乘之輯閱數十年乃舉行同時媿行尙恐疎略欲望五六十後猶有耄老之孫於屬疾方篤時能述大母行事若樗里者可多得哉故於宋節母之事益有望於續彤史遺編者

楊丐婦傳

市丐中有魁而狡黠者名籍於官曰丐頭眾丐屬焉恆以是獲利婦之夫長安鎮丐頭也道光某年爲仇馮某

所殺婦斂夫畢家之器用財賄一一白於姑顧傭婦曰  
夫我天也遇我厚今橫死我忍獨生間者方訝其言而  
婦仆地死矣蓋服藥毒發也都孝廉嶠謂馮丐之婦亦  
殉夫死作二丐婦傳綜其實不然楊丐之婦則信附之  
烈婦之末無愧也

甘泉鄉人稿卷十九